

Monumento

Minister Beke concretizando plan pa museo nacional

ORANJESTAD-Durante e bishita di trabao di Minister Beke, na caminda pa Copenhagen, el a haci uso di e oportunidad pa combersá un biaha mas cu secretario di Estado, Aad Nuys riba diferente tópico.

Entre otro e mandatario a elaborá riba e posibilidadnan di cuido di monumento, conseho di monumentonan pa Aruba y algun asunto pendiente desde su último bishita.

Minister Beke a ser informá cu señor Fons Assenberg, presidente di Cuido di Monumentonan na Hulanda lo ta bishitando Antiyas durante e temporada di fin di April y cuminsamento di Mei venidero y lo pasa Aruba tambe.

Señor Engelsman, presidente di Museo di Reino tambe lo compañía Assenberg pa di e forma aki e por duna asistencia na e Consejo pa Monumentonan di Aruba y alabes duna conseho pa cu e "set up" di Museo Nacional di Aruba.

AYUDO

Tambe Minister Beke a discutí e posibilidad pa un

persona di e departamento di Archivo Arubano por biaha pa Hulanda, pa aki tuma nota y selectá kiko lo ta di importancia y balor histórico nacional pa Aruba.

Otro punto cu a ser treci dilanti ta e consehonan experto pa cu atencion debido cu mantencion di puentenan natural, "Natural Bridge".

Minister Beke a probechá pa tene diferente otro reunionnan pendiente, promé cu el a sigui pa Cumbre Mundial Social na unda e lo topa y intercambiá idea cu varios lider y representantenan di paísnan rond mundo.

La Prensa. - (9 maart 1995)